



SOS DJEČIJA
SELA
BOSNA I HERCEGOVINA



NIJEDNO DIJETE NE TREBA ODRASTATI SAMO



Dragi naši,

Mnogi naši SOS prijatelji, kumovi i kume, često nas pitaju „Kada ćemo dobiti neko novo pismo“. Sada je vrijeme za novu priču i nadam se da joj se radujete, baš kao što se i mi radujemo kada sklapamo prijateljstva sa vama. Osim što se ovim putem naši kontakti iznova rađaju, sigurna sam da se rodi i pokoja suza, ali i iskren osmijeh kada pročitate da djeca, zahvaljujući vašoj podršci, žive radosno i bez briga.

Također, pismo je uvijek odlična prilika da vam se zahvalim za prijateljstvo, podršku i vjerovanje da zajednički možemo mijenjati živote djece. Vjerujem da ponekad, u teškom vremenu u kojem živimo, zaboravite koliko dobrog činite. Zato sam tu da vas podsjetim da, zbog vaše dobrote i plemenitog srca, mališani o kojima brinemo žive sretno i bezbrižno djetinjstvo, onako kako zaslužuje živjeti svako dijete na ovom svijetu.



SOS DJEČIJA
SELA
BOSNA I HERCEGOVINA



NIJEDNO DIJETE NE TREBA ODRASTATI SAMO

Sada uživajte u čitanju – možda će vam trebati i maramice!

Sigurna sam da već znate da u svakodnevnom radu sa djecom težimo da mališani odrastaju u sretnom okruženju, povezani jedni sa drugima, a posebno sa svojom biološkom braćom i sestrama. Svi mi koji imamo brata ili sestru, znamo da je riječ o neraskidivoj ljubavi i prijateljstvu. Moja starija sestra odavno već ne živi sa mnom, ali ne prođe ni dan da se ne čujemo, ma koliko obaveza imale. Kao male često smo se svađale oko raznih sitnica, ali kako su godine prolazile, postale smo najbolje prijateljice. Kada otputujem, šalje mi bezbroj poruka: „Jedeš li dobro?“, „Pazi da se ne prehladiš“, „Nemoj kupovati gluposti“. Nekad mislim da pretjeruje, ali znam da se brine za mene, jer za nju ću uvijek ostati njena „mala seka“.

Naša Iman je nedavno ispraćala svog mlađeg brata Tarika na putovanje u Prag. Prekrasni, zlatni Prag koji nikoga ne ostavlja ravnodušnim. Uprkos nedaćama kroz koje nijedno dijete ne bi trebalo proći, Iman i Tarik su, uz trud i podršku SOS mame Elme, izgradili odnos pun ljubavi i brige. Čak i kad se posvađaju oko igračaka ili obaveza u kući, njih dvoje su nerazdvojni.

Iako je Tarik putovao samo na nekoliko dana, Iman se veoma brinula: „Kada je odlazio, bilo mi je teško pustiti ga iz zagrljaja...“ Prije nego je krenuo, Iman se dosjetila – poklonila mu je malog plišanog zeku, kojeg je nazvala Many, da čuva Tarika u velikom Pragu, dok Iman nije tu. „To mu je mnogo značilo, dugo i čvrsto me je grlio.“ Tarik često kaže: „Iman, imam deset godina, više nisam mali“, ali za Iman on će uvijek biti mali braco, ma koliko godina imao.





SOS DJEČIJA
SELA
BOSNA I HERCEGOVINA



NIJEDNO DIJETE NE TREBA ODRASTATI SAMO

Trudimo se i nastojimo vas kroz razne kanale blagovremeno obavještavati o različitim aktivnostima na kojima radimo. Zbog toga vam ovim putem želim predstaviti **PODCAST** na kojem radimo vrijedno. Svake druge srijede, psihologinja i psihoterapeutkinja Senka Čimpo odgovara na brojna pitanja i dijeli korisne savjete o roditeljstvu, porodici, odgoju i mnogim drugim temama. U nastavku su neke od epizoda našeg podcasta. Nadam se da ćete uživati i pronaći temu koja vas zanima i o kojoj želite znati više.

Svakako vam preporučujem i da se pretplatite na naš YouTube kanal, kao i da nas pratite na društvenim mrežama. Na taj način ćete dobivati obavijesti o narednim epizodama podcast-a, ali i o drugim aktuelnostima iz naše organizacije.



Kako se bliži vrijeme praznika, često se sjetim svojih školskih dana, kada sam sa drugarima iz razreda pravila čestitke za meni drage ljude. Crtali smo snijeg, ukrase i sve što nas asocira na najblještavije doba u godini. Koristili smo voštane i drvene bojice, rezali kolaž papir, a naše ručice bile su posute šljokicama i ljepilom za papir. Sjećam se i osmijeha na licima roditelja, nane, dede i drugih ljudi kada bih im te iste čestitke uručila.

Takve osmijehe i radost kod vama bliskih osoba možete i vi izazvati kupovinom naših čestitki, a koje možete pronaći na [linku](#). I ove godine crteže su radila djeca. Vjerujemo da ćete se teško odlučiti koju čestitku izabrati!

Sretni praznici svima!



SOS DJEČIJA
SELA
BOSNA I HERCEGOVINA



NIJEDNO DIJETE NE TREBA ODRASTATI SAMO

Dragi prijatelji, još jednom veliko hvala za sve što činite za mališane o kojima brinemo.
Zbog vas uspijevamo u našoj misiji da nijedno dijete ne odrasta samo.

Za kraj ovog pisma, želim vas napomenuti kumstvo SOS porodica ovisi isključivo od vaše odluke, želje, mogućnosti i – vašeg dobrog srca. Nemate nikakvih zakonskih ili drugih obaveza ukoliko bilo kada ili zbog bilo kojeg razloga želite prekinuti svoje kumstvo. U tom slučaju molimo vas da nas kontaktirate putem maila kumstvo@sos-ds.ba ili telefona 033 465 053.

Ipak, mi se nadamo da će naše prijateljstvo trajati dugo te da ćete, uživajući u kumstvu, svjedočiti sreći i uspjesima generacija djece. Na [ovom linku](#) možete pročitati više o Politici privatnosti.

Bićemo sretni i da nam se javite na kumstvo@sos-ds.ba ukoliko imate bilo kakav prijedlog koji će unaprijediti našu komunikaciju.

S ljubavlju,
Džana Olovčić
SOS Dječija sela u BiH



Zbog zaštite privatnosti, imena
i fotografije djece su izmijenjena.



www.sos-ds.ba



kumstvo@sos-ds.ba



033 465 053
066 910 676